

Gran Festa da d'Istà

Gropes e jent da duta la valèdes ladines à tout pèrt al bel event de musega, folclor e tradizion che viventea vigni an la domenia de fin de sajón a Cianacei

De più a plata 5



Dò la defilèda, duc i Gropes e la Museghes se à binà tel pra te Pian de Parèda, olache l'è stat i descorsc e de bela sonèdes e esibizions.

N'otra bela edizion per la Gran Festa da d'Istà

Ence chest an l'è stat n gran aprijament per la musega e l'endrez del tendon e soraldut per la defilèda e la scomenzadives de la domenia, a cheles che à tout pèrt gropes e jent da duta la valèdes ladines



Evenc - A Cianacei ence chest an con gran suzess, l'è stat metù a jir la Gran Festa da d'Istà. Maraveous l'è veder l grumon de jent che se dèsc jù per meter a jir chest gran event: n centenè de volontadives che laora ensema desche picola celules de n corp uman. Ogneun fèsc e ogneun deida, dut per meter en esser un di più emportanc apuntamenc de l'istà fascian. En jebia, sot la pievia, l'è partì da Penia n gran cèr dut fornì de fiores che, dò aer portà sie colores te ogne piaz de la fraziòn del Comun, da mesa les nef l'è ruà te tendon, olache sobito l'è partì la musega del grop envià per

chela sera. Tant en jebia che ti etres dis, la sera è stata prejentèda con braura da Giorgio Pedron e i gropes de mùsega cernui da Danilo Planchensteiner, envié a encolorir i cater dis de festa, é stac aprijé ence chest an tant dal public che dai balarins. En domenia l'ciel l'era brun, zenza na nigola. Dadoman te Pian de Parèda l'è stat la messa e l'concert del grop sloven Kraska Harmonika e dapò l'tendon é stat viventà da la Banda Musicale di Frangarto.

Dò marena via à tacà a se binèr la jent ju per Chieva: tedant i volontadives e, sobito dò, duc i Gropes folk e la

Mùseghes de la cinch valèdes ladines. Chel de la defilèda l'è n moment olache l'leam anter i ladins se fèsc più strent e fon, n moment che vel recordèr l'emportanza de esser ladins e portèr inant la tradiziòn. Più che 1100 persones à defilà fora per la strèdes de Cianacei, stolc di colores de sie guant e la jent à podù fèr n viac anter l'passà, l didanché e l davegnir.

Te Pian de Parèda, dò che Remo Debertol à menà la bandiera e la autoritèdes à fat sie descorse e recordà l'emportanza de esser ladins, l'è stat ciantà l'Inn ladin e la Cianzon de Val de Fascia: l prum da la oujes

melodiouses de Gisela e Monika Dapunt del Conturines Echo da la Val Badia, compagnèdes da l'orghen de Alois e la chitara de Adalbert; la seconda da la ciantarina fascèna Martina lori ensema a Martina Chiocchetti. Dapodò, la picola Schuhplattlerinen de Fascia les à portà dant doi bai, compagnèdes dai orghegn de Gigio e Giordano. Sot al soreie, en ultima, la 11 Mùseghes envièdes per l'ocajion à sonà dant "Freude zur Musik" de Hubert Weissmann, che volessa dir "Legreza per la Mùsega" e dapodò "Radetzky Marsch" de Johann Strauss père, fosc una de la marces

più cognosciudes al mond.

La festa é jita inant te tendon, olache duc à podù magnèr, beiver e balèr. I gregn e i picoi, i ladins e chi da fora, chi che lurèa e chi che demò dajea n struf, duc à podù se goder chisc cater dis de festa dò n lonch istà de lurier. De segur chesta 39^a Gran Festa da d'Istà l'è stat motif de gran orgolie per duc chi che l'è endrezèda: n gran batiman a duc e a l'an che vegn!

Nicoletta Riz



Deplù fotografies sun
www.lausc.it



Momenc de tradizion, musega e folclor endèna la Gran Festa da d'istà a Cianacei (foto Andrea Costa).